

# Peristiwa-peristiwa . . . .



... Semenjak Nabi Ibrahim membina Kaabah maka di dalam bulan *Harām*, tidak ada satu golongan atau puak Arab yang tidak dibenarkan memasuki kota Makkah untuk mengerjakan haji.

Begitu umat Muslimin seramai 1,400 orang di iulukan oleh Junjungan Muhammad (s.a.w) pada bulan Dhu al-Qa'idah tahun 6 Hijrah. Angkatan itu, kerana permusuhan dan menjaga fitnah-fitnah dari orang Quraisy, sengaja tidak membawa kelengkapan perang – mereka hanya membawa pedang yang terletak di dalam sarungnya. Ini dibuat supaya orang Kafir Quraisy tidak salah sangka terhadap perjalanan haji itu sebab haji diwajibkan kepada kaum Muslimin pada tahun 5 Hijrah.

Sekalipun orang Kafir Quraisy mengaku dan menyiarkan bahawa Masjid al-Harām itu terbuka kepada seluruh bangsa Arab dengan tidak memandang adakah ia bermusuh dengan orang Quraisy atau tidak, namun kedatangan kaum Muslimin yang terdiri daripada orang-orang Arab Muḥājirīn dan Anṣār menerbitkan kecemasan dan kecemburuan kepada mereka – terutamanya setelah kebinasaan tentera mereka di dalam peperangan Khandak.

Mereka langsung melupakan bahawa mereka sebagai khadam Baitullah mengetahui dan mengakui

kewajipan-kewajipan terhadap kepada orang-orang yang ziarah ke negeri itu tetapi mereka mengecewakan umat Islam dengan membawa alasan-alasan yang lemah.

Demikianlah apabila perjalanan itu sudah tidak berapa jauh dari Makkah, Rasulullah mendapat tahu bahawa angkatannya yang tidak bersenjata itu telah dihadang oleh tentera Quraisy yang lengkap bersenjata di jalan masuk ke kota Makkah. Mendengar berita ini lalu Nabi mengelakkan pertentangan lalu memusing jalannya dan kemudian terus berjalan menuju ke Hudaibiyyah. Setibanya Nabi berkhemah di sana.

\* \* \*

Orang-orang Quraisy menghantar utusannya – utusan demi utusan, menghendaki supaya Nabi bersama rombongannya tidak memasuki kota Makkah – dan tidak menunaikan umrah tahun itu. Kemenangan siyarah yang pertama didapati – ertiinya bahawa orang Quraisy menunjukkan kelebihannya dan memberi pengakuannya akan adanya golongan kaum Muslimin.

Utusan yang akhir dihantarkan oleh orang Quraisy ialah ‘Urwah bin Mas‘ud al-Thaqafī. Ia seorang yang bijak dan apabila berjumpa Rasulullah ia berkata:

“Ya Muhammad! Tuan kumpulkan berbagai-bagai macam orang, kemudian tuan datang ke tempat ahli-ahli tuan

dan suku tuan sendiri untuk menghancurnya. Itu orang Quraisy sudah keluar dari Makkah dengan anak-anak untanya, mereka memakai kulit-kulit harimau (maksudnya orang-orang Quraisy sudah mengamuk seperti harimau – P) dan berjanji kepada Allah bahawa tuan tidak boleh masuk ke negeri itu dengan kekerasan selama-lamanya.”

Demikian katanya yang menuduh kedatangan Nabi hendak umrah itu melakukan kekerasan. Seterusnya ia berkata: “Mana tahu, barangkali esok pagi mereka itu meninggalkan tuan terserah kepada musuh-musuh tuan!”

‘Urwah membayangkan bahawa kaum Muslimin mungkin meninggalkan Nabi. Sebelum Rasulullah berkata apa-apa, Saiyidina Abu Bakar yang terkenal sabar – tidak dapat bersabar lagi – beliau lalu menjawab perkataan ‘Urwah yang mengecam itu dengan berkata:

“Apa engkau fikir kami akan meninggalkannya?”

“Siapa ini, Ya Muhammad” – tanya ‘Urwah buat-buat tidak kenal kepada Saiyidina Abu Bakar.

“Anak Abū Quhāfah!” sahut Nabi.

“Demi Allah! Jika tidak kerana ada budi engkau atasku, tentu aku

balas engkau dengannya” – kata ‘Urwah kepada Saiyidina Abu Bakar.

“Tetapi inilah”, katanya lalu memegang janggut Rasulullah (s.a.w) serta berkata-kata dengannya.

Melihat perbuatan ‘Urwah demikian, sahabat-sahabat yang hadir di situ naik marah mereka. Seseorang sahabat yang kenal benar dengan ‘Urwah iaitu Shu‘bah bin al-Mughīrah<sup>1</sup>, yang berdiri berhampiran Rasulullah - tak dapat menahan hati – walaupun dahulunya ia telah menerima budi ‘Urwah. Ia memukulkan penggal pedangnya ke tangan ‘Urwah sambil berkata:

“Tarik tangan engkau dari muka Rasulullah sebelum tangan itu tidak kembali lagi bersama engkau!”

“Kasihan engkau!” Kata ‘Urwah, “Alangkah kerasnya hati engkau!”

Rasulullah hanya tersenyum sahaja melihat peristiwa yang terjadi di antara ‘Urwah dan sahabat-sahabatnya. Kemudian ‘Urwah bertanya kepada Nabi: “Siapa ini ya Muhammad?”

Anak saudara engkau, Mughīrah bin Shu‘bah!” Jawab Nabi.

‘Urwah terus berkata: “Bukanlah baharu semalam aku basuh kesalahan engkau?” (Maksudnya dahulunya Mughīrah telah bersalah membunuh 13 orang dan hampir sahaja berlaku perperangan sekiranya ‘Urwah tidak membayarkan tebusan tuntutan *diyyāt* ke atas mereka – P).

Setelah memperhatikan hal ini ia pun balik kepada kaumnya dan memberi laporan kepada kaumnya

menasihati supaya rombongan itu dibenarkan mengerjakan Umrah tetapi orang-orang Kafir Quraisy berdegil dan tidak mahu menerima laporan itu.

\* \* \*

Kerana itu maka kaum Muslimin pun menghantarkan utusan pula tetapi utusan itu ditahan dan ini menyebabkan terjadinya *Bay‘ah al-Riḍwān* yaitu perjanjian setia akan membela utusan yang ditahan itu. Apabila ini diketahui oleh orang-orang Quraisy – timbulah takut mereka dan kerana itu utusan itu dilepaskan. Utusan itu ialah Saiyidina ‘Uthmān bin ‘Affān.

Peristiwa ini menyebabkan orang-orang Quraisy menghantarkan utusan damai. Mereka menghantar Suhail bin ‘Amrū al-‘Amīraj dan ‘Uwāṭif bin ‘Abdul ‘Uzzā.

Suhail, mulanya hendak berkata-kata dengan Nabi dengan suara yang keras. Sekiranya utusan-utusan yang lalu dibiarkan oleh sahabat-sahabat berkata-kata begitu tetapi kali ini percubaan mereka ditegah oleh sahabat-sahabat. ‘Abbād bin Bishr, seorang sahabat memperingatkan Suhail dengan katanya:

“Rendahkan suara engkau di hadapan Rasulullah!”

Di antara soal jawab Nabi dengan Suhail ialah:

“Mengapa kamu tidak benarkan kami tawaf di Baitullah?” – tanya Rasulullah.

Jawab Suhail: “Supaya orang Arab jangan bercerita bahawa tuan sudah masuk kepada kami

dengan kekerasan (memaksa) tetapi kalau tuan suka tahun hadapan kami boleh keluar meninggalkan Makkah tiga hari buat tuan.”

Demikianlah rundingan damai itu yang berakhir menimbulkan enam perjanjian yang dibuat seperti di bawah ini:

1. Kaum Muslimin balik ke Madinah – tahun itu tidak memasuki Makkah.
  2. Tahun hadapan kaum Muslimin boleh ziarah ke Makkah dan tinggal di sana selama tiga hari dengan membawa pedang di dalam sarung.
  3. Orang-orang Quraisy hendaklah keluar dari Makkah selama tiga hari.
  4. Melucutkan perperangan di antara kedua pihak selama 10 tahun, dan orang ramai mendapat keamanan dan menahan gangguannya daripada yang lain.
  5. Sesiapa yang datang kepada Muhammad dari orang-orang Quraisy dengan tidak seizin wali-walinya hendaklah dikembalikan kepada mereka (Quraisy); dan sesiapa pengikut Muhammad yang datang kepada Quraisy, mereka itu tidak dikembalikan.
  6. Sesiapa yang suka masuk ke dalam perjanjian Muhammad bolehlah ia masuk kepadanya; dan sesiapa yang suka masuk ke dalam perjanjian Quraisy, bolehlah ia masuk kepadanya.
- \* \* \*

Perlu diketahui bahawa kedudukan dan kekuatan Islam pada saat itu adalah di sebelah yang kuat dan

<sup>1</sup> Nama sebenarnya ialah al-Mughīrah bin Shu‘bah.

kerana itu mereka menyangka bahawa mereka berada di sebelah yang lebih.

Apabila diketahui mereka kandungan ini, mereka memandang Rasulullah kalah berdiplomasi dengan orang-orang kafir. Mereka merasa perjanjian ini berat sebelah.

Saiyidina ‘Umar ibn Al-Khaṭāb yang sentiasa berterus-terang, tak dapat menahan hati. Beliau terus menjumpai Saiyidina Abū Bakar lalu menyatakan:

“Bukankah ia Rasul Allah?”

Abū Bakar: “Ya”

‘Umar: “Bukankah kita kaum Muslimin?”

Abū Bakar: “Benar!”

‘Umar: “Bukankah mereka itu orang Musyrikin?”

Abū Bakar: “Benar!”

‘Umar: “Mengapa kita merendah-rendah (mengalah) dalam agama kita?”

Abū Bakar: “Ya ‘Umar! Tetaplah engkau di tempat engkau, kerana saya menyaksikan bahawa sebenarnya ia itu Rasul Allah!”

‘Umar: “Saya pun mengaku dia Rasul Allah!”

Kemudian Saiyidina ‘Umar mendapatkan Rasulullah (s.a.w) lalu bertanya:

“Bukankah tuan Rasul Allah?”

Nabi: “Ya!”

‘Umar: “Bukankah mereka itu kaum Musyrikin?”

‘Umar: “Mengapakah kita merendah (mengalah) dalam agama kita?”

Nabi: “Saya hamba Allah dan rasul-Nya, saya tidak akan menyalahi

perintah-Nya dan Dia tidak akan menyia-nyiakan saya!”

Begitulah timbul rasa tidak puas hati kaum Muslimin terhadap perjanjian itu disebabkan mereka memandang hanya sekali pandang sahaja.

Lebih jauh tatkala Saiyidina ‘Alī disuruh menulis surat perjanjian itu Rasulullah menyuruh ‘Alī menuliskan perkataan “*Bismi Allāhī al-Raḥmani al-Raḥīm*.”

Baharu sampai di sini suruhan Nabi, Suhail membantah dengan katanya “Saya tidak kenal ‘*Al-Raḥmani al-Raḥīm*’ itu. Tetapi tulislah *Bismika Allāhumma* (Dengan nama Engkau ya Allah).

Permintaan Suhail diikut Nabi.

Kemudian Nabi menyuruh tuliskan: “Inilah perjanjian yang dilakukan Muhammad Rasul Allah dengan Suhail bin ‘Amrū ..’. Suhail terus membantah dengan katanya:

“Kalau saya mengakui tuan Rasul Allah, tentulah tidak saya perangi tuan; tetapi tulislah nama tuan dengan nama orang tua tuan sendiri!”

Penulis naskhah itu, ‘Alī bin Abī Ṭālib tidak mahu menghapuskan perkataan “Rasul Allah” itu. Tetapi Nabi mendesak supaya diikut sehingga akhirnya Nabi sendiri memadamkannya sesudah ditunjukkan tempatnya.

Demikianlah ketika Rasulullah menyuruh tuliskan perjanjian yang mengatakan “Kalau ada orang-orang Islam

datang ke Makkah tidak dikembalikan mereka; dan kalau ada orang-orang Makkah yang datang kepada Nabi Muhammad wajib dikembalikan jika tidak ada izin walinya” – umat Muslimin tak tertahan melihat kepincangan itu, setelah mereka beberapa lama menanggung kezaliman orang-orang Quraisy. Mereka lalu berkata kepada Rasulullah:

“Tuan tuliskan ini ya Rasulullah?”

“Ya” sahut Nabi, sambil berkata: “Sesiapa yang pergi daripada kita kepada mereka itu, biarlah mereka dijauhkan Allah, dan sesiapa yang datang kepada kita dari golongan mereka, mudah-mudahan dijadikan Allah kepadanya kesenangan sesudah kesusahan.”

\* \* \*

Kalau kita perhatikan ajaran siyahah Rasulullah (s.a.w) di Hudaibiyyah ini tentunya menjadi satu pelajaran bagi golongan-golongan kita di dalam menyelenggarakan pertubuhan yang diikat di dalam “jenisnya” – bukan di dalam “banyaknya”. Umpamanya, seseorang yang sememangnya tidak setia kepada pertubuhan apalah gunanya disimpan - lebih baik berada kepada mereka kalau dikehendaki supaya dapat mengalirkan fikiran mereka dapat pula membawa penjelasan-penjelasan untuk perkembangan Islam kemudiannya.

Inilah kesan-kesannya bagaimanakah sejarahnya lebih jauh dalam masalah mengenai peristiwa perjanjian itu? Baca, *in shā-Allāh* dalam keluaran akan datang.